

Sémísi

Ebeq sáhnsahwe ahtebé ehwehne.

Áhnte ahtébiá kégá, Sémísiwe Sísane ábákawae íwíáhowe. Sémísiwe Sarúsarama suwahpeqte Sísá tagaríáh kéréq wahnahnú aninéna mah pahsí Sísá tagaríáh Ásíú ké séhréh aritanieéna sehiranúwe. Wega íwíáhéna, Sísansabé aiq pútare atáh kégá íre túbáh agia peh kaweq sansá miraigehe. Mirairataqmé sene kaweq sansá tagah kegá íwíáhéra, Mah kegá aiq pútaq Sísá tagaríáh ké wóe íwíáhigehe. Mah pahsí sáhnsáho kegá Sísane sánsá tábúsoqme sehgihehéna Manikánka Sémísi íwíáh atowana mah pahsí sehiranúwe.

Sémísiga mah pahsí sehiranúwe.

1 ¹Ínéwé Sémísi Maniká Iteriboreq itene Wahnah Sísá Karáhéreqne arambehri aní múge. Néne páhsi sáhnsahwe tagahro. Ite Ísara ke airápété téhtaré káhnáh míone. Itene igaqnaréhga wáhnaupéqté kéné marakórapeq abae agunsabé mó ke suwahpeq míáhwe. Ite ómiga néne ehweh sáhnsahwe íráhro.

Moke ite áhwáreh naneqka págege aitéh éhwéhne.

²Néne iyahnabo anímáráno, moke áhwáre naneq sínaraq iru ukiqme míáhro. ³Íre kaweq sunúq sínaq Manikánsabe aiq pútare ateq wene sánsá íre susa peh kawerue sehgirataq págegeue míahrahowe. Minawé aiq tagaríáhwe. ⁴Wene sánsá íre susa peh kawerue sehgirataq ite kaweqtaq míagehe. Ite kaweqtaq míéhrataqmé Manikánka séhréh aitena wega náina naneq íre tabonahigehe.

Ahtebé íwíáh tabonahi anínká púrerinkehe i ehwéhne.

⁵Íre ahtebéh anínká Manikánsabe, Ahtebé íwíáh nánio ue púrerínaraq Manikánka ahtebé íwíáh atankéhe. ⁶Manikánsabe, Nánio ue púrerirataq náninabomo árahinabomo íwíáhiyehboq peh aiq pútaq náninawire íwíáhoró. Wánínka mó kantoq mé kantorinserah árahinabomo íwíáhi anínká mó íwíáh mó íwíáhire. ⁷Manikánka náninabomo árahinabomo íwíáhi anímé wega íre náwinawire. ⁸Mó íwíáh mó íwíáhi anínká

tábúsoqme arámbéhrí íre miraia peh áhwára áhwáaire. Wega náninabomo árahinabomo íwíáhinsabé Manikánka íre náwinawire.

Tabonah kereq áhnte mensáméhnsánkákáq kéreqsabé irari ehwéhne.

⁹Sísa tagariéh aní tabonahínaaraq Manikánka wensabé, Anotah aní míahno atahnana iwíáh íwíáhinkehe. ¹⁰Uworapeqté náneq kirena áraniwe ehyataginserah áhnte monéákáq мэnsámehnsánkakaq sorupeh aní pukinae. Minayabe Manikánka áhnte moné matíéh ánínsábé, Pehgáriq aní míahno atahnana iwíáh íwíáhinkehe. ¹¹Ehbiehbeq anotah patáhitag uworapeqté náneq ehyatague ára megínaaraq íre kaweq naneq úkinae. Mina inserah áhnte monéákáq ánínká áhnte ahwímí árámbéhrínaraq pukinawire.

Manikánka ite ahabábáqtaqpeq íre móitahráhi ehwéhne.

¹²Menah Manikánka mahraréna, Ínénsabe arutaboiri anínká mókake kagai apéq náwénaraq oga mía míainkehe íre. Minayabe ahabárorahi tanáhráq sínaraq mi ahabábáqsábé ahqáho atéh ánínká kaweqtaq míahnaraq wega kagai apéq awaq mena iwíáh íwíáhinkehe. ¹³Mó aniné arupipeqté íwíáhgá we abarirana wega, Ahabárinie íwíáhínaaraq, Manikánka mi iwíáh aintéhre íwíáhineho. Írakaumo. Ahabábáqka Maniká íre sabirorahi puana wega mó ke ahabábáqtaqpeq íre móitahráhire.

¹⁴Téhwe itene irupipeqté íwíáhgá morání morániné iwíáh abarire. Minayabe ite ahabárigheéna iteitene íre kaweq naneqsabé irutaboírúnaga ite ehnenehenéna péhe éhwéh aitéhre. ¹⁵Kía míéh íníné arupipeq káriq aní míéhraana mina inserah itene irupipeq ahabábáq iwíáh kéhre. Kía míéh ínínká ani maqmaréhnserah itene irupipeqté íwíáhgá ahabábáq áhwárehre. Áhwárehraana ahabábáqka ite saiqnariahnaq áhnte ahabábáq aruqarurirataq pukoneheqmóe.

¹⁶Néne iyahnabo anímáríno, péhe éhwéhnsabé aiq pútare aritého. ¹⁷Moke kaweq naneqmarí íópeqté Ítéribógá aiq náire. We peh ahriahri téhrehabeq mía míai anínéna moke kaweq naneqmarí náí náinire. Mánkánahnka ebeq íre wahtonagéna anehe pehgáriragire. Manikánka íre mina tahnsanire. We íre mó sansá mó sansáni aní míre. We peh ahriahri téhrehabeq mía míai aníne.

¹⁸Maniká Iteribo wewega iwíáhéna ite omaq itowe. Omaq itonsabe wene aiq pútaq ehwéh írátáúnaraq aiq pútare ataráúnana wega, Néne animárí móe aitena kaweraitáaire. Téhwe ite kaweraitena anehe mó ke kaweraritankéhe.

Manikáne ehweh ireq sehgióro i ehwéhne.

¹⁹Néne iyahnabo anímáríno, kawerue íráhro. Mó kegá ehwehnirataq ahkabaqme ireq kawerue iwíághoro. Sene ehweh ireq pehwehrue iwíághue

ehwehgoro. Íre apubúue abiahsanoro. ²⁰ Apubúue abiahsano kegá Manikáne kaweq sansá íre miraorahowe. ²¹ Íre mirao naneq sansánkákáq moke ahabábáq sansánkákáq áhnte kagaire. Moke mi sansá itene irupipeqté súáhro. Manikánka wene ehweh ayu tahnsa itene irupipeq uqmataire. Minayabe iteite iuwahbeh sansá sueq wene ehweh kawerue sehgrataq itene iru kaweraitankéhe.

²² Minayabe Manikáne ehweh kawerue sehgióro. Íre peh iahrega íráhro. Írakaumo. Peh iahrega íráhnaraqmé peh iteitene péhe íwíáhyábé aiq pútare atagéhe. ²³ Wehukeníká Manikáne ehweh peh ahrega irena íre sehginaraq we timanopipéq tageh aní tahnsane. ²⁴ Mi aní wene náwíqkakaq auranabiah timanopipéq tagéna timano mitaq marena pokéna wene auranabiah apubúue abitagire.

²⁵ Manikáne ehwehme anotah kawéq éhwéhne. Mi ehwéh irena kawerue sehgi ánimé ahabábáqka íre saiqnariahrahire. Mi ehwéh íre abitarusa peh timanopipéq taga tagainserah sáhnsahena kawerue sehginaraq Manikánka, Kaweróne atankéhe.

²⁶ Wehukeníká iwíáhéna, Ínéwé Sísansabé aiq pútare atóge éna Manikánsabe kawerue iwíáh iwíáh atóge éna ahriahri abehq éhwéh iraréna wene péhe éhwéhniká wewe péhenuwíehre. Mi anínká, Ínéwé Sísansabé aiq pútare atóge éna Manikánsabe iwíáh iwíáh atóge ime íre awehraq kéh púana peh abehq iwíáhire. ²⁷ Manikáne ehweh sehgiro kegá ehneranimárínseq kéweinínsónseq íre kaweq sunúq séhréh aritera mah marákóipéqté áhbábáq sánsá íre miraia peh kaweqtaq mía míaowe. Minawé Maniká awahbeh sansáne.

Peh morá sánsá ómi kehinánsabé miraoro i ehwéhne.

2 ¹ Néne iyahnabo anímárinó, itene Wahnah Sísa Karáhé íopeq wahnahni anínsabé aiq pútare atáhwe. Minayabe anotah keyábé iwíáh iwíáhéq kawerariteq pehrápeqte ké inehepeq súého. ² Ite momiwíorabeq kaweq korósíákáq kaweq awáhríq náneqkákáq ánínseq tabonah aní subankia korósíákáq ánínseqka iteba sirataq mó anínsabé mó iwíáh mó anínsabé mó iwíáhiyeho. ³ Itega kaweq korósíákáq anínsabé, Kaweqtapéq tútuue míahno ateq tabonah anínsabé mobeq koiriwe míahno. Mahtaq igárápí tútuue míahno atého. ⁴ Mira iwíáhhome itega korósi tagahnsabé mó ke kaweq kee iwíáhariteq mó ke abehq kée iwíáh arítáhwe. Mira iwíáhhome itega saraqmárah wáhnáhmárinóká íre kawerue saraqmárahnserah iwíáhowe.

⁵ Néne iyahnabo anímárinó, néne ehweh íráhro. Manikánka mahraréna, Ínénsabe sirutaboiro kegá wahnah wahnahnurabeq awaq miagéhe ire. Wensabé aiq pútare atera kaweqtapéq awaq miagehéna Manikánka mah marákóipéqté tábónáh ké omaq sitéhre.

⁶ Itewe aneqsabé tabonah keyábé síéhruruo? Áhnte mensáméhnsánkákáq kegá ite íre kaweraitáh mino. Ite meiqmera

ehwehorabeq móitáh mino. ⁷Manikánka itensabé, Sísá Karáhéne animári móe aitéhre. Aitéhrara ménsámehnsánkakaq kéga Sísá Karáhéne kaweq awíqsábé abehq éhwéh atáhwe. Segá mina tahnsa áhbábárowe.

⁸Maniká itene Wahnahne ehwehnka mahraréna,

Arerensabé arutaboírónanserah mó keyábéákáq arutaboírúno ire.

(Wok Pris 19.18)

Minayabe itega mó keyábé irutaboíro ehwéh sehgiómé kaweq sansánowe.

⁹Itega anotah keyábé iwíáh iwíáhéq pehrápeqte ke inehepeq súáhmé mina íre kaweq sansánowe. Manikáne ehweh anterúáh púana mi ehwéhniká itensabé ahababáq ke woe aitéhre. ¹⁰Minayabe Mósísiga sehgióro ú ehweh áhnte kawerue sehgi ánínká peh morá éhwéh antehrúéhmé wega moke mi ehwéh aiq anterúéhre. ¹¹Manikánka mahraréna,

Mó aníné ahre weh abariiyeho ire.

Wega mó mahraréna,

Mó aní subiq súého ire.

(Kisim Bek 20.13-14, Lo 5.17-18)

Minayabe arega mó aníné ahre weh íre abariia peh mó aní subiq suahnawe arega mi ehwéh aiq anteruahne. ¹²Manikánka sehgióro ú ehwehnká ahababáq saiqnariahnaq wehuke soraq suahráhire. Wega mi ehwéhnsábé iwíáhéna mah kehiná kéhínáné sánsá saraqmarankéhe. Minayabe iwíáhue kaweq ehwéh iraréq kaweq sansánoro.

¹³Wehukéninká mó keyábé íre arutaboírínaraq Manikánka ehweh aitahna tanáhráq mi aní kamah awinkéhe. Mi tanáhráq mó keyábé arutaboíri anínsábé, Kaweróne atankéhe.

Íné aiq pútare atóge i anínká íre kaweq sansanéna abehq iwíáhi ehwéhne.

¹⁴Néne iyahnabo anímárinó, peh morá anínká mahraréna, Ínéga Sísansabé aiq pútare atóge ire. Wega iraréna Sísane sánsá íre sehgiómé wene ehwehme peh abehq úkire. Ínéga Sísansabé aiq pútare atóge irarinka we kaweratahráhiro? Írakaumo. Peh wewene ehwehnka íre kaweratahráhire. ¹⁵Arega Sísá tagaríáh wéh áhré tagé korósiakáq táhutahuqkakáq tabonahotaq ¹⁶íre náriasa peh ehweh teawenawe arene ehweh peh abehq náneq úkire. Arega wensabé, Tototaq mé ayahbankikitaq mé pehwehrué pokéwahno teawenawe íre náriasa arene ehwehnka árahue séhréh atankéhbo? Írakaumo. Arene ehweh peh abehq náneq úkire. ¹⁷Arega Sísansabé aiq pútare atóge iwíáhé mó ke íre séhréh aritahnawe arene iwíáh peh abehq náneq úkire.

¹⁸Mó morá anínká mahraréna, Mó kéga peh Sísansabé aiq pútare atáhwara mó kéga peh kaweq sansá miraowe ire. Mi ehwéhnsábé teiníe. Arega Sísansabé aiq pútare ate kaweq sansá íre miraónawe ínéga are tagéna arensabé, Árahue Sísá tagariahna aní móne atanínkono? Ínéga

kaweq sansá miraonayabé arega tagé ínénsabe, Sísa aiq pútare atahna aní móne ue ahtebahrahóne.

¹⁹Manikámé peh morá ánine aiq pútare atóge éna we aiq kaweróne. Peh morá mina irarénaga íre awehraq mire. Owainawamarínká moq minayabe aiq pútare atera áhreéra iransánowe. ²⁰Aiq pútare atahnayabé aiq awehraq mire íwíáhono? Aneqsabé kaweq arámbéhríininkono íwíáhono? Múguwahgu aní móne. Peh morá aiq pútare atóge éna we íre awehraq mire. Mahnayabe áwahewé teiníe.

²¹Itene igaqna Ébáráhmaga Manikáne ehweh sehginieéna wenahni Áhísáhki subiqme titirinaúwe. Wega íre túbáh agia peh Manikáne ehweh segiunsabe Manikánka wensabé, Kaweróne. Kaweqtaq míahne atóge úwe. *(Stat 22.1-14)*

²²Ébáráhmaga Manikánsabe aiq pútare atena págegeue sehgoráhi ehwéh teawutaq túbáh aginie íre úwe. Wega peh Manikánsabe aiq pútare atóge éna wene ehweh sehginauge íwíáhuwe. Sehgiunka wega Manikánsabe aiq pútare atowe sokigi awuwe. Minawé aiq ahtebaho?

²³Manikáne ehwehnka mahraréna,

Ébáráhmaga Manikánsabe aiq pútare atonsabe Manikánka wensabé, Kaweróne. Kaweqtaq míahne atóge úwe íre.

Manikánka Ébáráhmansabé mó mahraréna,

Arewe néne iyahnabo aní móne atowe úwe. *(Stat 15.6, Aisaia 41.8)*

Ébáráhmaga Manikáne ehweh kawerue sehgiunsabe mah pukúipéqté éhwéhnká aiq pútaragúwe. ²⁴Manikánsabe aiq pútare atóge irarime íre awehraq mire. Írakaumo. Peh Manikánsabe aiq pútare atena wene ehweh sehgi ánínsábé Manikánka, Kaweróne. Kaweqtaq míahne atéhre. Minawé aiq ahtebaho?

²⁵Weh aebó íní wenáwíq Áráhpae. Téhtaré Ísará ánitégá nahnso kené marakó ahboerageheéna Sósúaga eqmarowe. Eqmarowana Áráhpane nahtaqpeq suyana wega mi anité mehwehue kirabo aritena wenawahpeqte kégá subíyehoéna mó ahtápéq sokigi ariuwe. Wega miraúnsabe Manikánka, Kaweróne. Kaweqtaq míahne atowe.

(Josua 2.1-21, Íbaru 11.31)

²⁶Wehukeníne awanka wene anonka suena airaiq pokitaq we pusa ání míéhre. Mina inserah Manikánsabe aiq pútare atóge irari anínká wene kaweq sansá íre sehgmé we pusa ání tahnsa míéhre.

Itene ehwehme iwíáhue tagéq pehwehrué irarero i ehwéhne.

3 ¹Néne iyahnabo anímáráno, Manikánka ite síwáhnorúna kené arambehri iwíáhue tagéna págegeue ehweh aitahráhire. Minayabe tagaríáhwe. Wega mó Sísa tagaríáh kéné arambehri pehwehrué iwíáhue tagehre. Minayabe wehukega momiwíorabeq síwáhnoro ke áhnte úkiyeho. ²Ite ómiga mótaq mótarue áhwára áhwáraúne. Ehweh iraré

tanahráq ahriahri áhwára áhwára ehwéh íre irari anímé kaweqtaq mía miaire. Wene áwéhipeqté éhwéh kawerue wahnahni puana wega wene moke anonka kawerue wahnahnatiahrahire.

³Anotah ka wenáwíq ósiga itene ehweh kawerue irankeheéq áwéhipeq áhíniraté iyarone. Miraonaga ite iuwahbehraheq ósiga meiqmena móttéhre. ⁴Sípi soberi sansánsábé iwíáhoró. Sípiwe anotah nanere. Anotah soirínka sípi tauntahunue pagunoráhire. Sípi soberi anínká pehgáriq awánkátáté miraia náneq paberéhra na sípiga wehukénínká pokinie irabeq pokire. ⁵Mina inserah anebíwé pehgáriq naneréna peh anotah arámbéhrí kéhre. Anehbíga mó ke ahabáratahráhire.

Ite tagarionawe pehgáriq irágá anotah irárawe abae ague uworapeqté áhnte awánká tahrahire. ⁶Ahabábq ehwéhmé ira tahnsáne. Pehgáriq irágá anotah irárawe abae aginserah ahabábq ehwéhnká moq abaeue anotah agirana mó ahabábq áhwárehre. Iraipéqté éhwéhnká ahabábq iwíáh áhwárehra ahabábq anotah agorahire.

⁷Moke ménkámehnkámé, kabarame, weheme sóreq wanípípeqté páhmé wehukene kirabo kamarí úkorahowara wahnahnarítáhe.

⁸Mó morá ánínká wewene ahabábq ehweh íre saiqnarena wahnahnatiahrahire. Wehenka wehuke pehrana pukorahire. Ahabábq ehwéhnká apubúue abae agéna wehenka wehukení pehnserahnire.

⁹Itene iwéhipeqté éhwéhnká itene Wannah Maniká Iteribonsabé iwíáh iwíáh ateq anehe mó ke Manikánka we tahnsá miraro keyabé abehq éhwéh arítáhe. ¹⁰Iwíáh iwíáh ate ehwéhnkákákq abehq éhwéhnkákákq peh morá áwéhipeqté sire. Minawé íre kaweq sansáne. ¹¹Néne iyahnabo anímárino, arahnome kaweq né wanínkákákq abiqnóno wanínkákákq morábíté íre sire. ¹²Pópo awánkátáq inunara será íre iyahráhire. Párúq nahniáqtáq pópo será íre iyahráhire. Abiqnóno wanínká né waní íre úkorahire. Minayabe kaweq ehwéhnkákákq ahabábq ehwehnkákákq peh morá áwéhipeqté sime anotah íre kaweq sansáne.

Kaweq iwíáhi anínká kaweq sansáninkehe i ehwéhne.

¹³Ite mionarabeqte ahtebia ání kaweq iwíáhi anímé insebo? Ahtebia ánínká íre saiyoi anínéna wewene áwíq íre pankeréhre. Peh ahtebia sánsánéna kaweqtaq mía míairara mó kegá we tagéra, Ahtebia áníne igehe. ¹⁴Itega irupipeq mó keyabé anotah abíáhnšanéq ahriahri iteitene íwíq árahue pankeranéhnkono iwíáhirataqmé ite ahtebia ké méq kaweq iwíáhúna ke míone iwíáhiyeho. Péhe iwíáhiyeho. Aiq pútaq ehwéhnšané péhe éhwéhne atého. ¹⁵Íopeqté Íteríbógá mina tahnsa iwíáh íre áhwárehre. Írakaumo. Mi iwíáhwé mah marákóipéqté iwíáh wíre. Itene irupipeqté iwíáhgá mina tahnsa iwíáh aitéhrana owainawanka moq mi iwíáh aitéhre. ¹⁶Írátíáhiro. Sirupipeq mó keyabé abiahnšanéra ahriahri seyene síwíq pankeráh kegá íre kaweqtaq mía míaowe. Íre kaweqtaq mía míaéra áhnte ahabárowe.

¹⁷Íópeqté Itéríbógá iwíáh aitéh iwíáhwé ahriahri kaweq iwíáhe. Manikáne Awanka iwíáh aitéh kégá pehwehrue méq uwaréqme méq mó kené ehweh ireq mó keyábé sirtaboiréq kaweq sansá ariteq anotah anínseq íre áwíqkakaq anínseqsabé peh morá iwíáhéq ehweh pehipi íre iraria miraonehe e ehweh mira aruqaruowe. ¹⁸Itega uwaréqme peh morá iwíáh kahnaraq minawé sotápéq ayu uqmaráhnserah mire. Uwaréqme peh morá iwíáh kahnaraq peh kaweq sansámári miraorahúne. Minawé sotápéqté ménsáméhnsá kawerue kírénhserah mire.

**Mah marákóipéqté sánsánsábé awahbeh animé
Manikáne naruo aní míre i ehwéhne.**

4 ¹Itega ehwehéq tobehírataq mi sansámé aneq áwahe kehro? Itene irupipeqté iuwahbeh iwíáhgá moke mi íre káwéq sánsá áhwáreh mino. ²Ite iuwahbeh naneqmarí íre meyahráhonsabé meyaneheéq mó ke subiq súáhwe. Mó kené ménsámehnsánsabe aigará pabekiraq íre meyahráhonsabé meyaneheéq ehwehue tobhowe. Ite iuwahbeh naneq Manikánsabe, Náio ue íre teawéwe. Minayabe mi naneq íre matfáhwe. ³Itega wensabé, Náio urome wega aneqsabé íre náiasa túbáh agiro? Itega íre tábúsoqme iwíáhue, Náio urowe. Íre Manikáne arambehri miraoneheéq peh iteitene iuwahbeh naneq náio uronsabé túbáh agire.

⁴Ahbabáq inínká wenawehq auwena mó weh kéréhnserah itega Maniká auweq mah marákóipéqté sánsá sehgiówe. Mah marákóipéqté sánsá sehgi ánimé Maniká Iteribone naruo aní míéhre. Minawé aiq iahtebaho? Mah marákóipéqté náneqsabé arutaboiri anínká Manikáne naruo aní úkire. ⁵Manikáne ehwehnka mahraréna,

Manikánka Wenawa eqmaréhrana irupipeq tumíéhre. Itega
Manikánsabe kawerue irutaboirigeheéna wega págegeue
wahnahnaitéhre ire.

Aiq irarinsabé itega, Mi ehwéh peh abehq éhwéhne iwíáhiyeho.

⁶Manikánka ite anotahtaq séhréh aita aitaire. Minayabe wene ehwehnka mahraréna,

Sensíwíq pankeráh kéwé Manikánka íre séhréhia peh ahqáho
arítéhre.

Sensíwíq íre pankeráh kéwé Manikánka séhréh arítéhre ire.

(Gutpela Sindaun 3.34)

⁷Minayabe iteitene píribahri iwíáh sueq Maniká Iteriboga teí éhwéh kawerue sehgióro. Owainawansabé ahqáho atéhrataq wega iuwena pokinkehe. ⁸Maniká Iteriboba séq wene ehweh kawerue íráhro. Mirairataq wega iteba séna séhréh aitankéhe. Wehukeníká ayahnkara pabeq paberitaq ayahnkara aiq kawerire. Ahbabáq keo, mina inserah itene irupipeqté áhbábáq sueq kawerurero. Mó iwíáh mó iwíáho keo, itene irupipeq kaweq iwíáhigehboq mah marákóipéqté náneqsabé íre

irutaboiroro. ⁹Itene ahbabáqsabe iwíáhéq wíréh wíréh ehweh sueq ibisahro. Itene irupipeqté eyoyói iwíáh sueq íre kaweruraqe iwíáhoró. ¹⁰Itega Manikánsabe, Íné pehgáriq aní púana ínériahríáh íre awehraq aní míóge teawéro. Teawenana wega séhréh aitena ite moraní moraníne, Anotah aní míahno aitankéhe.

Mó keyábé ehweh arítého i ehwéhne.

¹¹Néne iyahnabo anímáríno, itega mó ke Manikáne animárínsábé íre kaweq ehwéh ariteq abehq ánímárí móe ariteho. Mirairataqmé Manikáne ehwehnsabé moq mina tahnsanowe. Wene ehwehnsabé awahrieh anínká mi ehwéh íre sehgiena, Peh abehq éhwéhne atéhre. ¹²Manikánka webataq sehgióro ú ehweh teí púana wewega ite sainsuena ehweh aitahráhire. Webataq mó ke kaweraritena mó ke íre kawerarítéhre. Minayabe itewe peh wehuke míáh púaq mó keyábé ehweh arítého. Minawé peh Manikáne arambehri wire.

Ite píribahriéq saiyo ke míyeho i ehwéhne.

¹³Táhmáro itega mahraréq, Ahbiah mó ke suwahpeq pokue mitaq peh morá ópéq méq arambehriue áhnte moné meyanéhe ewe. ¹⁴Mira íwíáho keo, teiníboq írátíáhro. Mókakeyabé ite íre tagaríáhwe. Mi tanáhráq ite oga míaneherabowamo. Itene oga mé tanáhráq nonahweyah tahnsáne. Nonahweyahnka pehgáriq tanáhráq kéna apubúue sawekinserah itene ogamé tanáhráq moq apubúue parabagorahire. ¹⁵Minayabe itega iwíáhona ehwéh sueq mahraréq, Itene Wahnahnka kowe aitahnarq ite oga méq mahraue arambehriehero.

¹⁶Amahnágawé iteitensabé iwíáh íwíáhéq ite íwíq pankereq, Iteriahríáh miraoneheqmúne ewe. Mina tahnsa píribahri sansámé íre kaweq sansáne. ¹⁷Kawerue iwíáhúno. Are kaweq sansá miraéyabe ahtebehnarqmé mi sansá miraúno. Íre mirainaraqmé aiq ahbabáriniewóne.

Áhnte mensáméhnsánkákáq keyábé irari ehwéhne.

5 ¹Áhnte mensáméhnsánkákáq kéó, minayabe ehweh teiníboq írátíáhro. Itene мэnsámehnsá pehipi kéhnsábé íre kaweq sunúq sína puaq uwo uwo éq ibisahro. ²Itega áhnte mitaq sáhato mensáméhnsá sósahbahrankírana itene kaweq korósiákáq wenuqka narúéhre. ³Itene móne ebáhmári íregáritaq pehipi kagairana awehgárogároríara mó kegá tagéra are anah ani móne iwíáhigehe. Itega móneyabé irutaboiréq amahnága áhnte soruparáh púana mókake kamah aina tanáhráq íérinawire. Wehukení osoq míéhraha érinserah íérinawire.

⁴Kawerue írátíáhro. Itene sotápéq arambehrio ke íre awehraq apéq náriéwara sega itensabé abiahnsa aitera, Íre kawerowe aitáhwe. Maniká

itene págege Wahnáhnká sene ehweh aiq íréhre. ⁵Ite mah marákóipéq méq áhnte kaweq naneq meweq ite iuwahbeh sansánowe. Minayabe wehga mayawenkakaq póéráhq subiqme kahnirinserah Manikánka ite anotahtaq kamah ainkéhe. ⁶Itega kaweqtaq míáh ké, itene ehwehnsabé íre ahqáho aitáh kéwé ehweh ariteq subiq súáhwe.

Itega págegeue méq Sísa tuina tanáhráqsábé áwénunoro i ehwéhne.

⁷Néne iyahnabo anímáríno, itene Wahnah tuina tanáhráqsábé kawerue áwénunoro. Sónsóréh ánínká wene so uqmarena ibonsi tanáhráqsábé áwénunire. Ménsámehnsá kíréhtáq mó ibonsi tanáhráq áwénunéna nera kankeheéna mó áwénunire. ⁸Sónsóréh ánínká áwénuninserah ite moq itene Wahnah sína tanáhráqsábé kawerue áwénunoro. Wega tuina tanáhráq aiq wahto agi puaq aiq sinawire íwíáhéq áwénunoro.

⁹Néne iyahnabo anímáríno, mó Sísa tagaríáh keyábé wensabé wensabé abiahnsa ariteq síéhruruirataq itene Wahnahnka moq itensabé ehweh aitanawire. Ehweh aitana tuina tanáhráqmé áhníbóránire. ¹⁰Néne iyahnabo anímáríno, Manikáne ehweh iraru kegá wenáwírue wene ehweh pahsúónsabe iwíáhoró. Sene naruoga síwíoqnotaq sene arambehri íre susa peh págegeue sehgiúwe. Segá mirau serahnoro.

¹¹Segá Manikáne arambehri íre susa peh págegeue sehgiúnsabé se kaweq ke wóe aritone. Naho naho wehukení wenáwíq Sóba míowe. Íre kaweq sunúq weba sútaq wega Manikáne sansá sehgiéna, Maniká kaweq aní mía máire íwíáhéna pehwehrue míowe. Minayabe Manikánka we séhréh atowaq tagaríáhwe. Manikánka itensabé moq anotahtaq arutaboíréna ahriahri séhréh aitéhre.

Íónka tagaríéhtáq aiq pútaruge íre irarero i ehwéhne.

¹²Néne iyahnabo anímáríno, mó kegá itene ehwehnsabé aiq pútare aitageheéq mó naneq áwírue íre irarero. Pópoqnahga tagaríéhtáq aiq pútariahnsanuge íre irarero. Íónka tagaríéhtáq aiq pútariahnsanuge íre irarero. Moke mó mina tahnsa éhwéh íre irarero. Itega mina tahnsa éhwéh irarirataq Manikánka ehweh aitankéhe. Ite kowe iwíáhirataq peh kowe ero. Ahqáho iwíáhirataq peh ahqáho ero.

Manikánka kaweqtaq mía míai aniné púreq ehwéh íréhre i ehwéhne.

¹³Ite míáhrabeqte áníné arupipeq umeh agínaraq wensabé púrerúno atóge. Wene arupipeq eyoyói anínsábé igonkónue Manikánsabe iwíáh íwíáhúno atóge. ¹⁴Awahre anínsábé Sísa tagaríáh kéráq wahnahno abóáwáh wéhyábé síáhrabúno atóge. Segá awahre anípá séra itene Wahnah áwírue wéri abaq atera wene awahreyabé púreratagéhe.

¹⁵Manikánka mah awáhré ání kaweratanawire íwíáhue púrerirataq Manikánka mi aniné ahbabáq kaqsuena wene awahre kaweratankéhe.

Kaweratahnana awaho ani míankehe. ¹⁶Minayabe itene ahabábq mari we teawíoro. Awaho animá rí míanehéq we púreratého ro. Kaweqtaq mía má i anínká Manikánsabe púrerínaraq wega irena págegeue mirainkehe.

¹⁷Manikáne ehweh irarú ani wenáwíq Éráisae. We peh wehukení ména ite tahnsá míowe. Wegá Manikánsabe íre ibonsinkeheéna anotahta q púrerúwana apahtá ró ópéqkákáq mó akáhtáq ópéqkákáq íre ibonsúwe. ¹⁸Anehe wega mó púrerúwana íópeqté áhnte íbónsúwana mah marákóipéqté ménsáméhnsá kawerue kirowe.

**Túbáh agí anínká ehweh mónkakáq sehginkeheéq
koséhréh atáhro i ehwéhne.**

¹⁹Néne iyahnabo anímá ríno, ite míáhrabeqte á ní aiq púta q ehwéh suena túbáh agínaraq mi ehwéh mónkakáq sehginkeheéq koséhréh atáhro. ²⁰Mi ahabábáq ánínká abehq sánsánira q ite séhréh atá hnsábé wene ahabábáq sansa súéh rana Manikánka wene áhnte ahabábáq kaqsúéh púana wenawa iraipéq íre pokinkehe. Minawé ah rera q matíá hro.